

嘉
禾
百
咏

張堯同 著

中
華
書
局

嘉禾百咏

此據學海類編本
排印初編各叢書
僅有此本

嘉禾百咏

宋 秀州張堯同 著

胥山

馬革浮屍去。君王太忍人。此山空廟貌。何以勸忠臣。

附考山在郡東二十五里。接嘉善縣境。一名張山。乃硤石之餘支也。吾郡諸山。自天目發源。盡于海鹽。北一支。由硤石蜿蜒而來。發爲胥山。平田突兀。廣尋數畝。舊經云。子胥伐越。駐兵于此。水經云。子胥死。浮屍至此。居民憐之。立祠其上。俗名伍王廟。旁有石龜。凝望注水。風雨中。農人見其行。疑爲怪。鑿其目。碑語有石棧自錢塘抵禦兒之胥口。凡十一字。惜不得其全文。又有磨劍石。長二丈許。劍痕在焉。其巔相傳卽子胥墓也。括異志云。隆興間。守臣李春。請撥隸郡學。以荒山皆石。不果。鄉人陳了翁之裔陳奎。鑿石結廬。名讀書堂。下有水曰胥江。屠應俊有胥山賦。其地題咏甚衆。八景之一曰胥山松濤。

父山

丹龜功成後。寥寥掩竹扉。但聞蟬已蛻。不見鶴來歸。

附考山在府城西南五十七里。舊屬嘉興。今析屬桐鄉。縣東南三十五里千金鄉。昔有道士父基。尸解于此。唯存巾篋。葬之。號桐棺冢。山有兩峰。東峰號史山。明初貝清江。朱以貞。結父山詩社。後郭觀察舜

舉吳洪雅公治西林僧公朗輩繼其盛云。又有洗藥井、藏兵塢、潮音院、顯靈廟。宋係時祀。三衢周孝子封顯靈王者。慈烏泉、碣石岳、陶隱居真誥云。嘉興父季真于宋景和元年得首楊許三真手蹟于剡縣馬氏。以呈廢帝。又陶隱居弟子題名。有嘉興父興祖。

澁湖

四境田相接。烟瀾自渺瀾。客來吟此景。無或比澁池。

附考。湖在郡城東南二里。春波門外。一名馬場湖。宋志云。闊五百丈。深三丈。北鄰城壕。東列廛市。其西則鴛湖也。亦名南湖。湖濱有濠股塔。湖南有樂郊水心。列岫三亭。及潘尙書園中有烟雨樓。俱另見。

鴛湖

東西兩湖水相竝。比鴛鴦。湖裏鴛鴦鳥。雙雙錦顰長。

附考。湖在郡城南三里。澄海門外。湖中多鴛鴦。故名。人云。以東西兩湖相麗如鴛鴦也。亦曰雙湖。總名南湖。宋從事郎聞人滋南湖草堂記云。構李澤國也。東南皆陂湖。而南湖尤大。計百有二十頃。元陳世昌有南湖賦。湖中有裴島。放鶴洲。諸勝。又名陸珣養魚池。八景之一曰鴛湖春曉。

長水

古來名未滅。人好水還清。一讀高僧疏。塵勞悟此生。

附考。水在郡城南六里。長五十餘里。自海甯發源。貫硤石。東北流入嘉興境。始皇東遊過此。聞土人水

市之謠。乃乘舟交易以應之。宋時有長水法師。明沈懋孝。學者稱長水先生。

谷水一作許尙詩

短棹經行處。風披藻荇香。中宵孤鶴唳。片月在滄浪。

附考。舊經云。古戰場夾谷口。秦長水縣治。今谷水是也。神異傳曰。由拳縣卽秦長水縣。淪陷爲谷。因名谷水。東南流逕嘉興縣城西。又東南逕鹽官縣故城南。水經注引吳記曰。谷水出吳小湖。逕由拳縣故城下。九州志云。谷水之右有馬塋城。吳王溫袁海爲鹽于此。梁元帝元覽賦曰。時度谷水之陽。尙想嘉禾之方。杜慶亭于吳后。雄橋李于越王。陸機對晉武云。三溇冬溫夏涼。谷水在其北。金澤章練小蒸。大蒸白牛諸塘在其西。封澳走馬諸塘在其東。柳橋之外。橫絕東渚者。秀州塘也。又吳地記云。海鹽縣東北二百里爲長谷。陸遜陸凱居此。又云。嘉興縣東二十五里有長谷亭。方輿勝覽云。陸遜所封名華亭谷。嘉禾志云。當湖北有華亭河。然則一水異名。大抵自峽石襟帶吾禾數邑。以至于柳耳。

天星河

拍岸浮春綠。菰蒲四遠生。網羅人不到。魚鳥亦忘情。

附考。河在郡城內東北。一名天心河。宋嘉禾志云。東西廣三十四丈。卽始皇發徒所掘。俗謂天心墜穴。泉與海通。故大旱不涸。水草不生。旁有碑存二十餘字。剝蝕不可讀。

穆溪

靜練明田外。源流笠澤通。不因逢歲旱。誰識濟時功。

附考。溪在郡城東北四里。接上谷湖。入太湖。水中多龍骨。

韭溪

終與雙溪接。分流入郭來。市橋人影合。不解洗塵埃。

附考。溪在郡城內。卽南湖之支流。經城而達于北運河。川瀆記云。太湖東通嘉興韭溪是也。溪上有西涎里。見搜神記。

雙溪

柔櫓聲相應。名齊漢魏收。可憐一溪水。分作兩塘流。

附考。溪在郡城東六里。以其近漢塘。魏塘。故名。漢塘入平湖。魏塘入嘉善。俱可由此以達松江。

秀水

好景明于畫。長浮五色波。一竿吾欲釣。來此聽漁歌。

附考。水在郡城北麗橋之東。相傳水浮五色。見者獲慶。亦稱繡水。明析邑名。因此。

白龍潭

呼吸風雲合。飛潛自有時。只愁潭底淺。頭角被人窺。

附考。潭在郡城西南四里。通越門外。景德寺旁有白虎穴。風濤溺舟。作三塔鎮之。今析屬秀水境。八景

之一曰龍潭暮雲。

禦兒

用此臨吳戰。何人爲越謀。夫差曾不寤。亡國始知羞。

附考。水在郡西南。去崇德縣治東南一里。舊名禦兒中涇。俗名沙渚塘。吳越時。棲兵于此。越語。勾踐之地。北至禦兒。左傳。吳越春秋。皆作禦。史記年表。作禦西。漢易爲語。而年表又作衛。水經曰。由拳西鄉有產兒。便能語。因詔爲語兒鄉。元豐中。朱長文續吳郡圖經云。范蠡獻西施于吳。道中生子。至此能語。張宮諭。廣皇輿考亦云。又越絕書曰。語兒鄉。故越界。大夫種曰。吾以禦兒臨之。又女陽亭者。勾踐入官于吳大夫。產女此亭。養于李鄉。勾踐勝吳。更名女陽。三朝國史云。有語兒亭。又名女兒亭。俗呼女兒墩。漢元封初。封轅終古爲禦兒侯。

范蠡湖

少伯曾居此。螺紋吐綵絲。一匳秋鏡好。猶可照西施。

附考。湖在郡城內西南金明寺旁。中產異螺五綵。相傳范蠡曾隱于此。有陶朱公里四字碑。又有西施妝臺。

梧桐涇

落落梧桐樹。何年作鳳鳴。試看千古翠。流盡一溪聲。

附考。涇舊屬郡境。後析桐鄉縣。名因之。在邑之東。卽濮川所通處也。五代時。鳳鳴其樹。邑人蔡孟熙繪圖。廬陵周忱爲記。

汾湖

我是滄浪叟。閒來繫釣艫。如何一湖水。半秀半吳江。

附考。湖舊屬郡境。後析嘉善。在縣西北三十六里。其半爲吳江地。故名分湖。後人加水爲汾耳。中產巨蟹。陶振有賦。楊惟楨有記。

柘湖

神居陰陽護。尋國捍洪波。莫慮蛟龍怒。年來畏叱呵。

附考。湖舊屬郡境。卽海鹽舊治淪陷者也。今在平湖縣華亭鄉。與嘉善接壤。東界華亭。今無復有湖。凡張堰、亭林、黃茅、白草之墟皆是也。多生柘樹。故山名柘山。林名柘林。柘一作橐。初陷時。有女子入湖爲三姑神。土人祠之。

馬塘涇

疑著風波惡。民謠亦畏人。築塘成堰後。斬馬祭河神。

附考。涇在郡城南七里。九域志云。始皇至此。遇水爲堰。斬馬祭之。屬嘉興。

杉青堰

舊吏家何在。空尋古柳隄。世情今亦爾。莫笑買臣妻。

附考。堰在郡城東北四里。其旁有閘。寰宇記。謂朱買臣妻改嫁杉青閘吏。北一里有死亭灣。爲妻死處。又有落帆亭。宋秀王諸公送鄉人陳確持節江東留題。亭址今析屬秀水。八景之一曰杉閘奔湍。

鳳凰洲

竹秀水色淨。忽來雙鳳凰。岐周昔鳴瑞。今復見文王。

附考。洲在郡城東七里。宋隆興元年。有五色鳥飲啄其上。故名。屬嘉興。

龍舌頭

一吸長川靜。烟雲忽有無。誰看領底月。誤欲探驪珠。

附考。在郡城東七里。卽雙溪之背也。今名會龍山。屬嘉興。

月壕

入徑深於塢。滄波近馬蹄。每尋蓮社友。咫尺走東西。

附考。壕在郡城西。其水抱城灣曲如月。故名。亦曰月河。屬秀水。

靈光井

玉甃祥光發。難藏世上名。定多慈護力。一飲百疴輕。

附考。井在郡城內精嚴寺。本晉徐熙之別業。因夜發光。捨爲寺。成帝賜名靈光。

幽瀾泉

神女鍾靈處。真堪療渴羌。滿巖秋玉色。一酌灑清涼。

附考。泉在景德寺中。舊屬郡境。後析嘉善。去縣東一里。相傳有僧見一女子。厲聲曰。窗外誰家女。應曰。堂中何處僧。逐之忽隱。掘得石刻。有幽瀾二字。石下得泉。大旱不涸。煮茶無滓。盛暑經宿而味不變。邑人盛唐有記。八景之一曰武水幽瀾。寺係唐天寶間創。又有大悲閣。雨花臺。翻經室。洗鉢池。補衲亭。蘿屋。月竹。爐烟。諸勝。

橋李城

螳螂方捕楚。黃雀遽乘吳。交怨終亡國。君王到死愚。

附考。城在郡城西南四十五里。春秋時。越敗吳于槁李。因其地產佳李。故名。越絕書。作就李。公羊傳。作醉里。史記。載吳王闔閭傷指。卒于涇。去槁李七里。夫差敗越于夫椒。報槁李也。又曰。西施醉于此。卽今濮院。析屬桐鄉。

射襄城

此地連江海。曾經古戰爭。干戈今不見。空有射襄名。

附考。城在郡城東北三十里。吳王禦越之所。一名聞川。今名王江涇。又東三里爲聞家湖。宋聞人氏家焉。宋武節將軍聞人宣扈蹕南遷。定家于此。其元孫恂爲進義校尉。死厓山之難。

四城

吳越爭雄日。區區在用兵。空餘爭戰地。無處不高城。

附考。東顧城。西新城。南子城。北主城。皆在郡境。吳築以禦越。

何城

報越心何壯。貪齊計已輕。忠言殊不聽。何用築斯城。

附考。郡西有何城。在崇德縣西三里。又有萱城。在崇德縣東三十里。晏城屬桐鄉。管城屬鹽官。皆春秋時築。此四城屬越境。

由拳廢縣

故城人不見。擊劍淚空霑。一絕悲聲遠。今猶說孝廉。

附考。在郡城南。搜神記曰。始皇東巡。望氣者云。五百年後。江東有天子氣。始皇至。令囚徒十萬餘人。掘汚其地。鑿審山爲硤。北迤六十里。至天星河止。表以惡名曰由拳。言因倦也。今春波門外合五水。俗訛油潭。

嘉禾墩

寂寞黃龍後。紛然壘上碑。廢興無處問。空詠草離離。

附考。墩在郡城東北四里。卽吳時生嘉禾之地。

古戰場

自昔干戈地。城空草自荒。漁樵懷舊事。何敢議興亡。

附考。在郡南四十五里。舊經云。古戰場夾谷口。卽秦長水縣治也。又名吳越戰場。其大者曰東蕩。界桐溪。鹽官閒。西蕩。崇桐。相半。皆廣數十里。土人墾地。往往得敗甲朽鏃云。

村門口

昔日荒閒地。今聞市井喧。人情看促迫。無復似當年。

附考。未詳。

宣公橋

祇因裴少保。功業敗垂成。往往橋邊客。今猶恨未平。

附考。橋在郡城東春波門外。相傳爲宣公建。屬嘉興。

五柳橋

爲懷陶靖節。無復見其人。誰種橋邊柳。猶含舊日春。

附考。橋在嘉興治西。俗名慶豐橋。

百步橋

舊址依然在。荒墟未百年。還分一橋水。流入幾家田。

附考。橋在杉青堰旁。

跨塘橋

路接張涇近。塘連谷水長。一聲清鶴唳。片月在滄浪。

附考。橋在嘉善縣西北。舊屬郡境。

菩薩橋

片雲初出岫。南北自飛揚。舊日橋邊路。猶聞鳥履香。

附考。橋在秀水縣治東。

竹橋

腰枕政亭北。橫斜古渡頭。風吹雙淚落。恨逐水東流。

附考。橋在秀水。

河內亭

掾死緣非命。兒來哭未休。舊時亭下淚。疑與水長流。

附考。亭在郡城西。漢張武父爲郡掾。送太守妻還河內。爲盜所殺。武哭于此。

嘉禾亭

五馬來何暮。經營指一彈。石碑書近事。留與後人看。

附考亭在府子城內。西有嘉禾、金風二亭。東有清風亭。北有利川、觀風、野泉、朝宗四亭。又有序賓亭。皆宋知州張瑜建。

列岫亭

吾州風物好。惟是欠青山。忽有洞庭色。來從一笑閒。
附考以下三亭俱在澎湖之南。

水心亭

波光磨不盡。鏡面絕纖塵。照得紅亭子。亭亭似美人。

樂郊亭

竹下清風好。時來挂幅巾。待逢田畝間。知是樂郊人。

會景亭

有景道不出。須來此水濱。十分清絕境。團作一亭春。

附考宋尙書潘師旦園在澎湖濱。中有南塢、海棠亭、白蓮沼、桃花亭、紅薇逕、茶溪、仙鶴亭、芙蓉塘、白苔橋、漁漁十景。咸會于此。故名園。舊屬柳氏。師旦知秀州。重築。趙孟頫有記。

南塢

岸回波曲曲。城轉草層層。忽見桃花落。還知到武陵。

海棠亭

薛砌迎烟渚。花開忽滿株。春風吹爛漫。如展蜀川圖。

白蓮沼

滄波圍四面。豔豔玉開花。自可除簾幕。清香不用遮。

桃花亭

不待東風折。池塘已自春。試看原上客。猶恐是秦人。

紅薇逕

漸放秋風晚。花無瀾漫香。淺深紅似錦。散影在滄浪。

茶溪

茶林那復有。零落村樵人。舊日溪邊叟。空悲二月春。

仙鶴亭

杳杳雲間路。重重隔翠林。數聲清夜後。來伴月邊吟。

芙蓉塘

一發連千丈。紅雲出素波。秋風吹欲老。無奈落花何。

白苧橋

徧隴敷青綠。桑麻共幾家。滿城羅綺子。應笑不栽花。

漁澱

野水連天闊。滄波引釣縉。寄言溪上叟。莫學直鉤人。

懷蘇亭

猶使樽前客。常懷沒後名。好風吹遠韻。如有笑歌聲。

附考。亭在府治東子城上。宋建。與蘇小墓相望。故名。後改曰朝陽樓。

披雲閣

茲樓常勝地。高望極陵嶒。欲觀青天色。還須上一層。

附考。閣與懷蘇亭相近。宋知州方滋建。後改名風月無邊樓。

景龍樓

千秋傳異綵。百尺護雕闌。欲識金龍瑞。丹霄試仰看。

附考。樓卽東塔寺東廡鐘樓也。宋孝宗父子僭。調爲嘉興縣丞。生孝宗。幼時登樓墮地。左右失色。孝宗屹然不動。寺僧先夕夢金龍挂于樓角。因名。事詳揮塵錄。

烟雨樓

妙手誰烘染。梳烟沐雨姿。一聲長笛晚。人在倚樓時。

附考。樓舊在郡城東南滌湖之濱。五代時吳越王錢元璩建。宋嘉定中王希呂重修。元季毀。明嘉靖間知府趙瀛濬內墮淤土。移填湖中。構樓五楹。兵憲沈奎復闢其後。爲釣鼈磯。遂爲南湖之勝。又名疑樓。八景之一曰春波烟雨。

月波樓

天闊冰壺淨。溪平玉鑑寒。卷簾看晚色。鷗鳥竝闌干。

附考。樓在郡西北城上。宋元祐中知州令狐挺建。政和中毛滂重修。有記。下瞰金魚池。唐刺史丁廷贊養金鯽于此。又張能臣名酒記曰。月波秀州酒名。又宋詞吹笛月波樓下。有何人知得八景之一曰月波秋霽。

真如院

田家輕脫屣。聊結淨人緣。影外香燈寂。清風百世傳。

附考。院在郡城南四里。屬秀水。唐至德中裴休捨宅爲至德院。雪峰和尚結庵其中。宋改真如院。明洪武時定爲教寺。今仍之。內有雪峰井。長水塔。裴相清輝堂。綵雲橋。柏屏。龍槐。石梅。纓絡松。東坡煮茶亭。諸景。司馬光有記。

雪峰庵

一語合頭悟。師承豈在身。戲言廬墓客。未是報恩人。